

He Whakatau

Me mātua pānui kia marama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. He aha ngā kararehe kei te pāmu a Koro? He aha ngā kararehe rata? Kimihia ngā kararehe rata i roto i te pukapuka *Te Pāmu A Koro*.

He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te mōhio o te ākonga ki te kupu “pāmu”.

Matapakia ngā momo kararehe rerekē ka kitea e te tangata i te pāmu.

Kōrerorerotia ngā āhuatanga o ētahi o aua kararehe.

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e marama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. Nā wai te pāmu?
2. He aha ngā kararehe i taua pāmu?
3. E hia ngā momo kararehe?
4. Ki ōu whakaaro, e hia o aua kararehe he mōkaikai? Ko ēhea?
5. He nui te pāmu a Koro? He aha i pēnā ai ōu whakaaro?

Ngā whakautu ki ngā whakapuaki māramatanga

1. Nā Koro.
2. He hōiho, he ngeru, he kurī, he nanekoti, he heihei, he hipi.
3. E ono.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He tipako mōhiohio mai i te pukapuka.

He whakatakinga ā-roro, he whakaharatau

I mua i te pānui i te pukapuka, matapakia ngā momo pāmu rerekē – mai i ngā pito whenua āhua noho ki ngā teihana rahi. He aha pea ngā momo kararehe ka kitea i te pāmu iti?

Kia oti i te ākonga te pukapuka te pānui, matapakia ngā kupu āhua i whakamahia ki te whakaahua i ngā kararehe. Kua whakamahia aua kupu āhua e te ākonga, ētahi atu kupu rānei?

Kōrerorerotia ētahi mahi o te pāmu me ngā take i pērā ai pea te ruarua o ngā kararehe a Koro.

He aha ngā momo kararehe e kitea noatia ana i ngā pāmu o Aotearoa, i ērā atu wāhi hoki o te ao.